

lis Gnovis

■ **CORMONS.** Vueli speciâl

«Slow Food» al è lât a scrutinâ cemût che e je lade, regjon par regjon, la «Campagna olearia 2018». I risultâts dal Friûl e di Triest son stâts presentâts, parie cun chei di Molis, di Sicilie e di Pulie, ai 3 di Dicembar (spie: www.slowfood.it/campagna-olearia-2018-molise-sicilia-puglia-e-friuli-venezia-giulia/). La clime de Vierte stade e imprometeve une anade straordenarie e lis robis a son ladis pardabon benon, ma no dapardut. Il raccolt al è stât speciâl sul Cui gurizan e sù sù fin su lis cuelinis a jevât de provincie di Udin, cun rindiments cressûts dal 10 al 18%. Tal Friûl centrâl e tal mandament di San Denêl, invezit, la pudiese asiatiche e à causionât dams grandons scancelant, in cualchi câs, dute la produzion. A Soreli amont, la anade e à confermât sù par jù i risultâts di an passât, tant in fat di cuantitâts che di cualitât.

■ **GURIZE.** Confronts su la Meteorologjie

E je partide ai 12 di Dicembar la schirie di apontaments, che a profundissaran i acjadiments meteorologjics plui comuns, imaneade a Gurize dal Grop speleologjic gurizan «C. Seppenhofer» e de clape «Pazzi per il meteogoriziano & storm chasing». A son stadis programadis 4 seradis, a 20 li de «Sale Dora Bassi» di strade Garibaldi 7, te capitâl dal Friûl orientâl. Daspò de convigne su la nêf, si larà indevant cognossint i temporai, ai 16 di Zenâr, e la buere, ai 13 di Fevrâr. Par fini cuntune serade dedicate ai glaçars, ai 13 di Març. Di chês strade, si fevelarà anje de scuvierte di calcite criogjeniche tun dipuesit soterani, su la mont Cjanine.

■ **LA VALLETTA.** Une Patrie tal Mâr Mediterani

Finît il timp dal rodaç, il Fogolâr furlan di Malte al à screât in mût solen e uficial la sô ativitât. Ai 8 di Dicembar,

e je stade fate une grande fieste li dal «Mediterranean Conference Centre», insuazant la manifestazion «Friuli meets Malta» te programazion di «La Valletta, Capitâl europeane de culture 2018». Il president dal Fogolâr, Stefano De Stalis di Ravasclêt, cul diretif e cui socis, ur à dât il biel acet ai presidents dal Consei regionâl, Pier Mauro Zanin, e di «Friuli nel Mondo», Adriano Luci. Chest an cu ven, a àn garantît ducj «o puartarin Malte in Friûl», par profondi un confront fra culturis, arts e lenghis e par slargjâ lis colaborazions economichis e culturâls.

■ **UDIN.** Il «Tierç setôr» su la rêl

Il «Centri servizi volontariât» regionâl al à rinovât il so lûc internet par garantîr une centralitât gnove ai Ents dal «Tierç setôr» («Ets») e ai «Cta», al ven a stâi i Coordinaments teritoriâi di ambit, che a son 18. La direzion dal gnûf imprest informatic e je: www.csvfg.it. Il fin primaril dal rinovament al è stât chel di simplifîcâ la navegazion e di favorî la difusion dai contignûts e des informazions. In plui di cognossi lis ativitâts programadis in ogni cjanton de regjon, si podarà anje seguînt cualchidune stant cjase, in gracie dal servizi gnûf crei des «dretis streaming», suntu cjanâl «You Tube» di pueste.

Joibe 20	S. Zefirin	Lunis 24	S. Delfin
Vinars 21	S. Pieri Canisio	Martars 25	Nadâl dal Signor
Sabide 22	S. Francescje Cabrini	Miercus 26	S. Stieffin Martar
Domenie 23	S. Vitorie	Il timp	Bufaris e tant frêt



Il soreli
Ai 26 al iève aes 7.48
e al va a mont aes 16.27.



La lune
Ai 29 Prin cuart.

Il proverbi
Ognidun a tuartis tal so bosc.

Lis voris dal mès
Dicembar al è un mès par fâ fieste in famee,
alore al è miôr stâ in cjase tal cjalt.

Partî dai Bens comuns

Une «rivoluzion»
te culture juridiche
taliane



Lis vilis di Clavais e di Liaris, tal Cjanâl di Guart

Tal cincuantenari dal articul di Garret Hardin «The Tragedy of the Commons», publicât de riviste «Science» (162/1968), bot e sclop, il dibatiment sui Bens comuns, sui Bens publics e sui Bens coletifs e sul miôr mût par gjestiju al torne di grande atualitât.

Ai 30 di Novembar, i juriscj Alberto Lucarelli e Ugo Mattei, intant di une convigne programade li de «Accademia dei Lincei», a àn inviât la racuelte des firmis par presentâ, in forme di Leç di iniziative populâr, la riforme dal Codiç civil in materie di Bens publics, scrite dal 2008 de «Comission Rodotà» (www.giustizia.it/giustizia/it/mg_1_12_1.wp?contentId=SPS47617).

«O tornin a partî di chel test, parcè che lis leçs sul Demani e su la Proprietât publiche no son stadis buinis di difindi i Bens e i dirits dai citadins, ma a àn pluïst danezât e favorît il ladroneç des risorsis naturâls, des infrastruturis, dai servizis publics e dai dirits sociâi, cence benefici pe coletivitât», al à motivât Lucarelli, che al à anje zontât: «Fâ jentrâ tal nestri ordenament juridic lis categoriis dai Bens comuns (risorsis naturâls), dai Bens sociâi (istruzione, ricerce, lavôr, salût) e dai Bens sovrans (infrastruturis strategjichis, servizis publics essenziâi), al vûl di meti in vore la Costituzion». Cualchi zornade dopo, ai 13 di Dicembar, al è colât il prin inovâl di chê Leç rivoluzionarie che, pe prime volte te storie de Republiche taliane, e à ricognossût in plen il valôr sociâl, economic e ambientâl dai Bens coletifs, professantju «Ordenament juridic primari des Comunitâts originaris», seont i principis dai articui 2, 9, 42 e 43 de Costituzion. In gracie de Leç statâl 168/2017, fate buine a la unanimitât dal Parlament, i «Domini collettivi» – che in Friûl si identifichin cui nons di «Bens», di «Viciniis», di «Consors» («Antichi Consorzi pri-

Al torne atual
il dibatiment
su Bens
comuns,
Bens publics
e Bens coletifs
e sul miôr mût
par gjestiju.
Inviade
la racuelte
des firmis
par presentâ,
in forme di Leç
di iniziative
popolâr,
la riforme
dal Codiç Civil
in materie
di Bens publics

vati» o «Consorzi degli Abitanti originari...»), di «Jus» e di «Srenje» e di «Comunelle», di «Nachbarschaft» o di «Aventi Diritto di Servitù»... – a àn dirit di governâsi di bessoi in fat di statûts, di aministrazion sogjetive e ogjetive e di gjestion dal patrimoni naturâl, economic e culturâl in proprietât coletive. Passât il prin cjaldan de Leç «Norme in materia di Domini collettivi», al è scjadût il timp riservât a lis Regions par esercitâ lis competencis stabilidis de Leç 97/1994. Si che, dal in doman di Sante Luzie di chest an (anje in Friûl, la chê la Aministrazion regionâl no je intervignude), ur tocje ai «Ents esponenziâi des Coletivitâts titulârs», ognidun pal so teritori di competence, di proviodi: destinazion dai Bens; garantiis di partecipazion a la gjestion; identificazion dai patrimoni coletifs, coordinament fra Comunitâts e Ents teritoriâi; e formis pal coinvoltament des Comunitâts tes sieltis urbanistichis e di svilup local.

Une aplicazion positive de Leç 168, cemût che al marcave il giornalista Paolo Cacciari, za dal 2017, dal sigûr e podarà zovâ par favorî il proget di valorizazion dai Bens comuns inviât di Lucarelli e di Mattei, di une bande, e dal Laboratori de sussidiarietât «Labsus» (cu la propueste dai «Regolaments pe aministrazion condividude; spie

www.labsus.org/i-regolamenti-per-lamministrazione-condivisa-dei-beni-comuni/), di chê altre. «Metêt in zornade i Manuâi di Dirit – al scriveve Cacciari, cuant che il Parlament al à fate buine la norme –. Lis formis de proprietât a includin une forme gnove; no son plui dôs, ma trê: proprietât private, publiche e coletive. Une rivoluzion vere te culture juridiche e anje politiche... La propueste che, za fa 10 agns, e fasè la Comission Rodotà, considerant «comuns» un pocjis di categoriis di «Bens» di meti dentri tal Codiç civil, vuê e oten une atuazion, parziâl ma significative».

Mario Zili

Messe par furlan
cu la corâl «Venuti»

A Udin, la Messe par furlan e ven cjantade sabide ai 22 di Dicembar, a 18, li de capele de «Puritât», daprûf dal domo. E compagnarà la celebrazion liturgjiche la corâl «Venuti» di Manzignel. Al cjantarà messe pre Davide Larice dal centri «Giovanni Micesio». Radio Spazio e trasmet sul moment, ogni setemane, dute la liturgjie.

Peraulis in dismentie par cure di Mario Martinis

❖ **BISSEBOVE**

s.f. = turbine, uragano, vento impetuoso
(composto da biscia e bova, derivata dal latino *bōva* "serpente", da qui il significato traslato)
Chei nui neris lajù a puartin la bissebove, tornin a cjase!
Quelle nubi nere laggju portano l'uragano, torniamo a casa!

❖ **BLEC**

s.m. = toppa, pezzo di stoffa per rattoppare; frammento; smorfia
(dal serbo-croato o dallo sloveno *blek*, a sua volta derivato dal medio alto tedesco *vlek* "pezzo di stoffa")
O ai di meti doi blecs tai bregons di vore di Milio.
Devo mettere due toppe nei pantaloni da lavoro di Emilio.
Menie e à distacât il frutin de tete e lui al à fat subite il blec.
Domenica ha staccato il bimbo dal seno e lui ha subito fatto una smorfia.

❖ **BOCON**

s.m. = boccone, boccata; pezzo, brano
(da *bucca* con il suffisso *-on*)
Celestine, mi dâstu un bocon di cerce?
Celestina, mi dai un boccone d'assaggio?

❖ **BLEON**

s.m. = lenzuolo
(di origine longobarda, è sopravvissuta solo nel friulano, la cui forma deriva da **blahjô*, ricostruito sull'antico tedesco *blaha* "pezza di tela grossolana")
Chei bleons ca mai à regalâts mè sùr pes gnocis.
Queste lenzuola me le ha regalate mia sorella per le nozze.

❖ **BLÂF**

agg. = azzurro chiaro (parola antica per designare la sfumatura chiara dell'azzurro)
(dal francoe blao "azzurro")
Il cil al è di un blâf mai viodût prime.
Il cielo è di un azzurro chiaro mai visto prima.

❖ **BOLP**

s.m. = volpe
(dal latino *vulpēs* "volpe", ma la variante con a b- iniziale è centro-settentrionale)
Usgnot passade la bolp e à copade une gjaline tal gjalinar di Nani.
Stanotte la volpe ha ucciso una gallina dal pollaio di Giovanni.